

Frits Goedgedrag a tuma despedida cu un curason agradecido di por a sirbi

WILLEMSTAD – Frits Goedgedrag a tuma despedida ayera nochí cu un curason agradecido di por a sirbi su comunidad di Antia y Boneiro. E ex mandatario a anuncia cu e y su casa Dulcie lo bay biba na Aruba, pero cu nan lo sigui bishita Corsou cu frecuencia. Durante un recepcion anima cu a conta cu representantenan di basicamente tur sector di comunidad, e gobernador saliente a papia di gratitud. Remarcabel na e recepcion tabata ausencia

di representantenan importante di representantenan di MFK y Pueblo Soberano. E ex gobernador a aprecia e presencia di tanto gremio. “Si... pa mi boso ta kerí, kerí como amigo y hendenan cu mi por a conta cun’e. Nos ta aki awe nochí pa duna otro man, no un man djis pa cuminda otro so, sino tambe pa tuma despedida di otro. Pasobra... tur cuminsamento tin su fin. Hopi bes durante recep-

cionnan, mi ta trata na papia di algo cu ta na mi curason y mayoria di biaha ta trata di convivencia, di empatia of di cualke otro norma y balor cu na mi parecer ta importante. Mi tempo como boso Gobernador a pasa y no a keda mi nada otro sino di yama.... danki.

Mi a invita boso na e encuentro aki, pa expresa mi gratitud.... danki pa boso amistad....danki pa boso cooperacion. Mi ta gradicido pa e tempo cu mi tabata boso Gobernador y di por a cumpli cu esaki durante e 10 añanan tras di lomba.

Mi ta gradicido pa e team fantastico di colaborado cu mi a haya di regalo, principalmente esnan cu a asisti mi di acerca. cu placer mi ta corda riba e encuentronan cu e diferente gobiernonan y especificamente cu e minister presidentnan cu mi por a traha cun’e. Traha hunto cu boso semper tabata

bay di un forma masha amical y compañía cu hopi humor. cu alegria mi ta corda tambe riba e conciertonan presenta aki den palacio y mi ta principalmente gradicido cu hobenan tambe por tabat’ey. Mi ta contento di por a contribui na promove muziek y cultura di e forma aki. Mi ta gradicido di por tabata envolvi den formacion di un pais nobo y di por a yuda stimula pensamiento y idea pa e pais nobo Corsou. Por ultimo mi ta expresa mi gratitud pa e confiansa cu Su Mahestad Reina Beatrix a conferi na mi y tambe pa e confiansa i sosten di mi esposa Dulcie y nos yiunan durante e tempo cu mi tabata Gobernador.

Tur esaki... ta pertenece awor na pasado. gradicido mi ta tambe pa e rato cu mi ta pasando cu boso awe nochí. Pa hopi di boso lo ta e delaster biaha cu nos ta topa. E pensa-

mento aki ta causami emocion. Naturalmente un danki ‘grandi’ pa tur esnan cu a haci lo maximo pa e recepcion aki por cana manera mester ta. Mi futuro tambe mi ta mira cu gratitud. Lo mi por tuma un poco sosiego awor, dedica tempo na mi famia, lesa mas tanto y scucha muziek bunita. Si mi bay biaha ta pasobra mi kier y no pasobra mi mester. Ban brinda awor pa dushi Corsou y su desaroyo positivo”, asina e mandatario saliente a bisa. Di parti di Gobierno, prome minister Stanley Betrian a gradici Goedgedrag pa su trabounan pa nos comunidad. El a entrega tambe un regalo na e gobernador saliente, un obra di e artista destaca di Corsou José Maria Capricorne. Riba e combinacion di foto por tira un bista momentonan di e recepcion di despedida di Gobernador Goedgedrag. □